


**Geoffroy, Antoine - candidat / La  
Rivière, Jacques-Simon Gilles de -  
président. - An Asthmati Aquae  
Thermales ?**

**1710.**

***Paris : Typis viduae Francisci  
Muguet, Regis & Facult.***

***Medicinae Typographi***

***Cote : ms 2325 n°45***



## QUÆSTIO MEDICA,

Quodlibetariis disputationibus manè discutienda in Scholis Medicorum, die Jovis vigesimâ Februarii 1710.

M. JACOBO-SIMONE GILLES DE LA RIVIERE,  
Doctore Medico, Præside.

*An Asthmatis Aquæ Thermales?*



### I.

**V**IT A cùm definiatur caloris in humido permansio; hujus proprium est quòd vivamus, respirationis verò quòd acceptam semèl vitam foveamus: facilitas respirandi perennitèr cupienda; difficultas contrà, vèl cessatio pertimescendæ: heu! quàm tamèn misera humanæ fortis conditio; pro leviori mentis aut corporis motu statim anhelii sumus; verùm ab isthâc anhelatione noli expavescere; talem à motu inductam spirandi difficultatem quies sedat: de illâ tantùm curare debes, quæ à naturali statu videtur recedere; adeò usquè, si parva & frequens sit respiratio cum stertore ac sibilo, ob asperæ arteriæ, ejusdem bronchiorum obstructionem compressionemve, veri Asthmatis nomenclaturam credas; cujus curæ nemo sanæ mentis incautus esse debet: hujusce mali fomites causas vis inquirere; non alibi quàm in ipsis pulmonibus pervestigandæ, quorum canaliculi bronchiales simul cum vesiculis, flatibus rarò, crudis nonnunquam tuberculis, crassis sæpiùs, viscidis, ac glutinosis succis, gravantur, obturanturve; ex illorum autem animadversione, quæ sit signis atque affectarum partium naturâ, omnis decernitur curandi methodus, facili convenientium medicamentorum negotio procuranda: igitur flatus sint aut tubercula, quæ anhelationem efficiant; discutientibus exsiccantibusve utaris velim: si crassi contrà, viscidi, ac glutinosi humores; remedia adhibe liquida potiùs quàm sicca, quæ eisdem attenuando, incidendo & detergendo valeant exhaurire; nisi instet stato temporis intervallo recurrens paroxifmus: tunc enim phlebotomiâ, cucurbitularum applicatione, enematis, aliisque revellentibus imminens suffocatio vitanda.

### II.

**A**STHMATIS tres assignantur species; prima, levioris momenti, vocatur Dyspnæa, in quâ difficilis est tantùm respiratio absquè ullo symptomate; secunda, idem Asthmatis nomen retinet, in quâ difficilior redditur, sine febre tamèn, sed cum stertore & sibilo; tertia, Orthopnæa nuncupatur, in quâ difficillima sit; adeò ut ægrotantes non nisi erectâ





cervice atque hianti ore spirare possint : Asthma solùm & Orthopnœa hîc locum habent ; communiter dicuntur morbi , mulieribus quàm viris , senibus quàm juvenibus magis familiares ; ambos pariunt sapissimè lenti , pertinacesque succi , vias , itus , reditusque aëris intercludentes ; cruda etiam non rarò tubercula , congestionum soboles , quæ licèt agros lecto non affigant , doloribusve discrucient ; ex his tamen non minus impendet periculum : hæc pulmonum vasis adnata bronchiales ductus mole suâ premere pro certo habere debes ; tùm ex ipsâ anhelatione , tùm ex pulsu omninò inæquali ac intermittente ; crassorum contra viscosorumque humorum , quibus præ cæteris pulmonares vesiculæ infarciuntur , *τὴν μαρτυρίαν* adest : dùm inter respirandum sibilus unâ cum stertore auditur : horum affectuum fidem asseclam esse catarrhum , quis inficias ire potest ? Hunc à glandulis in palato laringe & trachæa disseminatis depluere , importuna vehemensque tussis ; à vasis verò majoribus febris & palpitatione satîs probant . Utrumque simul exoriri pater ex subitâ *δυσπνοία* summam pectoris angustiam inferente . O fortunate æger ! cui periclitanti solers ac prudens Medicus , citò , tutò & jucundè auxiliatrices manus dederit ; serò atque difficultè medicinam parabis , cùm humores spissiores facti , vasis ita impinguntur , ut non nisi maximo negotio averruncari possint ; seriùs adhuc si vires excussioni ampliùs non sufficiant : tunc enim ( miserabile dictu ) à tussi periculum magis quàm salus imminet pulmonibus ; valido siquidem , licèt inani concussu , quo thorax , pulmonesque quassati fatiscunt ; fluxio adaugetur ; expectorationis opus unicam salutis spem , inchoare videtur natura , nusquam verò perficere .

## III.

**E** TELLURIS gremio quæ vi ignis subterranei accensæ scaturiunt aquæ , mineralium æquè ac metallorum facultatibus imprægnatæ , Thermæ solent nuncupari : ex iis quædam ferventes sunt , aliæ calidæ , nonnullæ verò tepidæ , pro majori aut minori caloris gradu ipsismet aquis per fermentationem inducto , ex variâ principiorum quibus constant fossilia , permixtione ; talem præterea inter se , & à cæteris aquarum speciebus distinctionem habent ; at aliæ , verbi gratiâ , nitri , salis , vitrioli , aluminis , sapore præditæ sint : aliæ verò ferrum , æs sive cuprum , sulphur , plumbum , bitumen redoleant : verùm ad quid tot diversarum rerum suppellex & *εὐδαιμονία* ; nisi ut præsentaneum resultet ad profligandos morbos remedium , quod quidè ut relinquere grande nefas , sic indiscriminatim adhibere perniciosissimum : in ferventes aquas nemo ausit labra , nudumve corpus immergere ; multis tamèn earundem vapor & limus levamen afferunt ; calidas etiam externæ respunnt partes , internas autem mirum in modum recreant ; tepidas deniquè forinsecus tantùm admittère proficuum est ; supremum contra plures , eosque pertinacissimos affectus medicamen Aquæ Thermæ . Omni sanè alio si non efficacius credas ; præsentius saltem ac jucundius debes prædicare : Petis sudorifera , ad movendos sudores nihil æquè præstat ac præfervidus earundem vapor seu halitus ? Vis



excitare transpirationem, fluxiles reddere humores, contractos artus restituere, debiles roborare; hæc omnia (bonis ægotantium rebus) adimplerit tepens balneum; refrigeratas partes calefaciendi, induratas emolliendi, vacillantes firmandi occasio se præbet. Aquarum Thermalium fœtu, harum luti incrustatione, earundemque stillicidio seu irroratione opus illud perficies: humores tandem cujuscvis generis, crassos videlicet attenuare, lentos incidere, tenaciter adherentes detergere, sputationem liberam promoveri, partes ferè omnes, præsertim pulmones importuno hinc & illinc affluxu debilitatos, inque suis functionibus languescientes redintegrare oportet; ad has tam salubres Aquas (velut ad sacram anchoram) velis citò confugere: illarum potus interiora jugiter abluit: magis quam acetum & mel facultatem habet abstergendi atque incidendi: viscerum obstructions referat, referata plus satis aut immoderata ad pristinum symmetriæ statum reducit; uno dicam verbo, debaccantium huc & illuc humorum ferociam coercendo, demulcendove copiosioreni simul spirituum animalium promovet emanationem, quorum accessu brevi recreantur omnes partes, naturalemque assequuntur tonum: quid plura? Non prius corporis penetralia subiit potus ille, quin liberam statim liberalemque simul omnis generis excrementorum videas dejectionem, per sudores, aut urinas, alvi fluxum, aut anakatharsim.

## I V.

**M**INERALIUM ut & metallorum supellestem totam noli dicere inutilem, vel naturæ nostræ inimicam. Eorumdem vires & usus in arte medendi satis probant, variæ quæ ex his sunt præparationes, tam Chymicæ quàm Galenicæ: inter metalla minium, verbi gratiâ, cerusa, sal, balsamum Saturni, aliaque id genus plumbi effecta, cancris, vulneribus, & fissuris profunt maximè resolvendo atque exsiccando; æs ustum, crocus ejusdem vel ærugo fistulas ac ulcera detergendi, atque ad cicatricem promovendi vim habent apud Chirurgos notissimam: ferrum tandem metallicæ familiæ saluberrimum quis non fatebitur? etenim particulis salino-sulphureis atque alkalinis constans, ad tollendas obstructions (morborum ferè omnium causas) rectè conducit: ex mineralibus autem sal, viventium æquè ac mortuorum salus, appetitum dicitur excitare, cibi fastidia, nauseasque amovendo; quanta sit in nitro facultas attenuandi, incidendi, & aperiendi, vulgo Medicorum satis patet; sulphur affectuum pulmonarium (quasi aridus) humorum putredini resistit, vique suâ exsiccante simul ac balsamicâ, Asthmaticis, Catarrhisve aut Phtysi laborantibus evidentè auxiliatur; ἀσπαστῶ humiditatum hostis infensissimus, dura emolliendi, superflua discutiendi, humoresque viscidos ac tenaces abstergendi vim habet. Optimum quidem Asthmatis levamen, maximè si ejusdem vaporibus unâ cum sulphuris, salis, vitrioli, aluminis, nitri, particulis, gravidæ sunt Aquæ Thermales: plerosque ægotantium, Asthmaticos præsertim cujuscvis sexûs, ætatisve (solis exceptis infantia & senectâ) salubritèr se habere earundem potu constat inter omnes: nemo tamen ausit ad has ac-



cedere, nisi bellè præparatus, benignaque Veris, aut Autumni tempestas existat. Verùm qui secùs se geret, temeritatis suæ pœnas dabit. Similiter puniendus veniet, qui statim à potu balneum intrare, aut alterutrum crudo plenoque ventriculo aggredi voluerit.

V.

**A**STHMATI curando non pauca subveniunt præfidia; fœlicitèr celebratur venæ sectio, habitâ priùs ratione morbi, ætatis, virium, & temperamenti. Crebrò injiciuntur enemata, quibus cum attenuante victu vomitus aliquoties, sæpiùs blanda Catharsis debet succedere: verùm intèr alia palmam merentur Aquæ Thermales; Plethoram duntaxat, vel suffocationis metum tollit Phlebotomia. Crassorum tantummodò intestinorum balnea, sunt clysteres. Vomitus tandèm, & blanda Catharsis, solas ventriculi, alvinarumque partium spurcicias valent abstergere; causam verò morbificam nullatenùs expugnant: solus itaque Aquarum Thermalium usus utramque implet paginam. Ægros consequentèr à tam gravi affectu liberare potest. An non calefaciendi, attenuandi, incidendi, digerendi, aperiendi, ac detergendi amplo satis apparatu instructæ sunt illæ Aquæ: egregium sanè munus cujuslibet temperamenti Asthmaticis à naturâ oblatum, Aquæ Thermales; præ cæteris efficaciam habent in potu, tum ob blandum halituosumve calorem ipsis insitum, tum ob benignos sulphuris & bituminis quibus jugitèr turgescunt, vapores; tum deniquè ob particularum salis v. g. nitri, aluminis, vitrioli, queis imprægnantur tenuitatem quoquò versùs ad penetrandum aptam, Asthmatisve mineram seù fontem resolvendum, exsiccandum; adeò ut verum sit dictu, non minùs tutum ac salutare Aquis Thermalibus uti in Asthmate, quàm hoc affectu laborare perniciosum.

*Ergò Asthmati Aquæ Thermales.*

### DOMINI DOCTORES DISPUTATURI.

<i>M. Andreas Cressé.</i>	<i>M. Joannes Gelly.</i>	<i>M. Ludovicus Labbé.</i>
<i>M. Armandus-Josephus Colot, Chirurgia Professor.</i>	<i>M. Claudius Burlet, Regis Hispaniarum Medicus primarius.</i>	<i>M. Josephus Thomasseau.</i>
<i>M. Philippus Caron.</i>	<i>M. Alexander-Petrus Mattot.</i>	<i>M. Ludovicus Poirier, Serenissimi Ducis Britannia Medicus primarius.</i>

Proponebat Parisiis ANTONIUS GEOFFROY,  
Balneolensis, Baccalaureus Medicus. A. R. S. H. 1710.

Typis Viduæ Francisci Muguet, Regis & Facult. Medicinæ Typographi.